

Vun driweriwer

erscheint auf www.lenauheim.de

monatliche
Erscheinung

Januar 2017

von Helen Alba

Vun frieher gewehnt

Was kann mer anres erwarte vum Winter? Vill Schnee, stark kalt, ritschich, mer hat jo ke Kurasch, for ausm Haus zu gehn. Doch gits Sache, die mer erlediche muss, grad wanns drauss bitter kalt oder glattich is. Meischt zieh ich solchi Ausgäng so lang in die Längt, wies nor geht. Weil es is schun vorkumm, dass ich „Hase gfang“ han, doch ausser blooi Flecke nit meh passiert is!

Un wies sich e bissl ufgewärmt, es Wetter rumgshlaa hat, han ich mich zammgepackt un sin inkaafe gang. Alles war voller Matsch, vor de Wohnblocks un ach vor de Gschäfte. Gar ke Gspur vun Schneeschippe, ich sin hin un her gewatschelt, han mich an jedem Phoschte feschtghal un ausgeruht, es war jedenfalls e Qual.

Wie ich mich so ausschnauf, kummt de Vetter Pheder aus Fratelia uf mich zu un schennt sich aus: „So e Zustand, ke Mensch denkt dran, de ville Schnee dann, wann er vum Himmel fällt, ufseit zu schippe. Bei mir vor em Haus, do war um sechs Uhr morjets es Plaschter sauwer gschippt. Un ich han phaarmol aach tachsiwer gschippt un gekehrt, so sin ich des vun frieher gewehnt!“

Ja, frieher! Wanns iwer Nacht gschneet hat, do sin die Leit in aller Herrgottsfrieh ufgstann un han Schnee gschippt. Zuerscht de Wech bis uf die Gass, dann de Wech uf der Gass un zuletscht de Wech ufs Tenn un zu de Ställ. Un der was faul war, bei dem mer uf der Gass die Fussgspure im Schnee feschtgetret hat, der is verschennt un ausstalliert gin. Iwerhaupscht sin jo in seller Zeit gar vill Leit an de Zug. Aus alli Gasse. Sie sin in die Stadt zu ihrem Arweitsplatz gependelt. Un dass se jo nit de Zug verpasse, hats heesche misse – je. Un drum war de Schnee schun in aller Herrgottsfrieh gschippt. Des hat sich eenfach so gheert!

Die Gscheitheit mitm Suppeleffl gfress!

Do war de Vetter Stefan aus Bentschek mol vor Johre in Bad Felix uf Tratament. Er hat so e Kart ghat vum Sindikat, is dorte in Felix schlecht un recht inquatiert gin, hat sei Behandlung vorghol un aach e Platz in der Kantin reserviert ghat. Un wie des schun vorkomme sellt, wann e Mann leenich ins Bad fahre tut, hats sich grad so gemacht, dass de Vetter Stefan aach e hibschi Dame an seim Tisch hucke ghat hat.

Am erschte Tach is unser Vetter nit fertich gin, des Weib zu betrachte. Er hat feschtgestellt, dass es zwaa allerliebschti Griebchen in die Backe kriet hat, wanns gelacht hat, dass es beim Rede nit grad die Gscheitheit mitm Suppeleffl gfress hat, awer aach, dass sei Tischdame e goldni Kett am Hals bamble hat ghat. Un an dere Kett war e Rindsknoche un e Flugzeich als Glicksbringer angebrung.

An eem scheene Tach leffle die zwaa heißhungrich ihre Supp, de Vetter Stefan werft ab un zu e Blick uf des Weib, des wu ufmol ufheert zu leffle un de Vetter Stefan froot:

"Gelt Vetter, eich gfallt des Flugzeich do aarich gut?"

"Jo, sicher. Doch noch vill besser gfallt mer der Flugplatz!"